

# Correspondance Frédéric Mistral - Jules Boissière

1885

Maiano en Prouvènço, 14 de setèmbe de 85

Moun bèu Bouissiero,

Dève d'abord te dire que siéu encarta de saupre que li jouvènt dóu felibrige, vous siguès acampa quàuquis-un pèr atuba l'un emé l'autre vòsti flamado prouvençalo. Es en fasènt ansin, es en barrulant vosto santo jouvènço dins li coumbo, li colo e li planuro dóu país, que l'avèn perfumado de ferigoulo e de tóuti lis erbo de soun jardin, e qu'avèn trouva li sourgènt de la pouèsio e de la pouèsio naturalo.

Enfant dóu pople, pouèto dóu pople, aposto dóu sauvamen naciounau, devèn de-longo assaboura nosto mangiho emé lou viéure populàri e refresca nosto bevèndo dins li font e dins li pous de la païsanié. Aro, arribèn au pica de la daio.

N'oubliden pas qu, despièi 400 an s'es emplega tóuti li forço e tóuti li couquinarié de l'esprit uman pèr nous desprouvençalisa e, causo óurriblo, tóuti li letru e ome noutable de Prouvènço an ajuda de touto soun influènci à-n-aquéu mouvemen contro naturo. Se voulès donc considèra ço que s'es fa despièi trento an, pèr reviéuda lou sentimen prouvençau, e la glòri que s'es amoulounado sus nosto lengo reflourido, vous faudra counveni qu'avèn pas mau mau mena la barco.

Mai tout acò s'es fa noun sènso lucho aspro, nimai sènso gàubi. Metès-vous bèn en tèsto que naviguan au mitan dis estèu e que la prudènci es la proumièro vertu di combatènt feble de noubre e mau arma.

L'essenciau es d'agué la fe, es de crèire à l'estello qu'a tant bèn enjusqu'aro coundu nosto barco. Ma counvicioun partejado deja pèr quàuquis ome de pensado e que lou felibrige, porto en éu la soulucioun di gràndi questioun poulitico e soucialo que boulegon l'umanita coume poulitico generalo, devèn teni de meme e desira lou sistèmo federau: federacioun di pople, counfederacioun latino e reviéure di Prouvènço dins uno naturalo e libro freirejacioun. Mai avans de s'avala ubertamen à-n-aquéu presfa suprème, fau espera la la definicioun de la fourmidablo guerro que, latènto o declarado, s'achavanis toujours que mai entre lou germanisme e la latinita. A la Franço murtrido, à la Franço, cavaliero de la civilisacioun latino, devèn fidelita e devouamen de fiéu, car es elo que soustèn, coume a soustengu sèmpe la bataio.

Anen donc pas, pèr d'imprudènci vano, faire lou jo de l'enemi mourtau de nosto raço, es coumeproumetre is iue dis ignourènt emé di mespresènt, li resultat counquist.

Tenen-nous pèr aro à la questioun de lengo e luchen ardidamen, de countùnio e de tout biais, pèr remetre en ounour dins li famiho prouvençalo lou parla de la terro de Prouvènço e rapelas-vous que, la lengo sauvado, tóuti li liberta n'en gisclaren à soun moumen. Inutile de mai cava.

© CIEL d'Oc – Avoust 2007